



Luta Hamutuk

INSTITUTU BA PESQUIZA/INVESTIGASAUN, ADVOKASIA NO KAMPAÑA
Timor-Leste Institute for Research, Advocacy and Campaigns

Add: Rua Gov. Celestino da Silva-Farol, Aldeia Lirio, Suco Motael, Vera Cruz, Dili
Email Add: lutahamutuk2005@yahoo.com
PO. BOX: 1034, Correios, Dili, Timor-Leste
Tel: (+670) 332 2619 or (+670) 724 5063, 726 3783 & 724 3966

ALOKASAUN FUNDU PETROLIFERU SEI HALO GOVERNUN AMP UKUN BA TINAN RUA HO BALUN DEIT ...!!

Introdusaun

Iha tinan ida ho balun nia laran, Governu AMP foti ona osan lubun husi Fundu Petroliferu hamutuk miliaun US\$40 ba iha orsamentu Tranzitoriu, Orsamentu inisiu Ano civil 2008 parlamentu nasional aprova tiha ona miliaun US\$294. Agora dadaun iha proposta orsamentu Rectificativo 2008, governu AMP proposta atu foti miliaun US\$396.1 husi kalkulasaun rendimentu sustentavel (ESI), tamba la to'o governu atu foti tan miliaun US\$290.7 husi Fundu Petroliferu hanesan osan ekstraordinariu. Entaun total alokasaun Fundu Petroliferu ba orsamentu geral do estado husi orsamentu Tranzitoriu, orsamentu Inisiu no orsamentu Rectificativo, Governu AMP gasta ona **miliaun US\$40**, atu sei gasta tan **miliaun US\$294**, no atu sei foti tan **miliaun US\$686.8** husi Fundu Petroliferu.

Foti liu Kalkulasaun Rendimentu Sustentavel

Bazeia ba artigu 9 lei Fundu Petroliferu, hateten katak *"laiha transferensia maka bele halo husi Fundu Petroliferu ba iha orsamentu geral do estado, wainhira transferensia ne'e liu tiha kalkulasaun rendimentu sustentavel*. Maibe iha alinea

(d) "sekuandu sei iha esplikasaun detalha konaba motivu ne'e, ba iha interesse tempu naruk Timor Leste nian nebe sei la afeita transferensia ba montante superior husi rendimentu sustentavel". Sentidu husi artigu ne'e dehan katak, governu bele halo transferensia liu husi kalkulasaun rendimentu sustentavel maibe tenke justifika ninia rendimentu retornu iha futuru.

Prudensialidade

Proposta orsamentu rectificativo nebe Governu hato'o atu hodi foti osan husi Fundu Petroliferu ho montante boot hatudu katak, Governu ida ne'e laiha prudensialidade ba espiritu Lei Fundu Petroliferu, nebe hateten iha Lei Fundu Petroliferu katak *"all assumption made shall be prudent, reflect international best practice and be based upon internationally recognized standard"* **asumsaun hotu tenke mai husi prudensialidade, refleta pratika diak internasional nian no bazeia ba rekunyesementu standar internasional**. Prudensialidade katak hatudu laran luak, no labele ambisiozu atu gasta osan minarai ne'e hotu kedas, maibe rai hela mos ba jersaun aban bain rua.

Industria minarai nudar industria ida mak ho ninia risiko boot tebes.

Iha esperensia ida husi kompania **Statoil** nebe iha ninia projektu produsaun iha medio oriente, hetan estragus total iha ninia plataforma depois de akontesementu rai nakadoko makas. Bazeia ba esperensia ida ne'e ami Luta Hamutuk hakarak fo hanoin ba estadu Timor Leste katak, ita so iha deit uniku plataforma ida iha tasi laran nebe naran Bayu Undan. Sekarik buat ruma akontese ho plataforma ne'e, konserteza produsaun sei para total, entaun sei fo impaktu negativu makas ba kalkulasaun rendimentu sustentavel-Fundu Petroliferu.

Investimentu Fundu Petroliferu ba OGE	Klarifikasaun	Deskripsaun	Total USD
Tranzisaun Jul – Dez 07	Transfere tiha ona	Miliaun	40
Orsamentu tinan civil Jan – Dec 2008	Seidauk transfere - aprova tiha ona	Miliaun	294
Orsamentu rectificativo	Seidauk aprova	Miliaun	396.1
Aumenta extraordinariu	Seidauk aprova	Miliaun	290.7
Total		Biliaun	1,020.8

Konkluziun

Bazeia ba analiza ida ne'e, Luta Hamutuk konklui katak osan Fundu Petroliferu nudar fontes importante hodi reforsa orsamentu geral do estadu kada tinan. Maibe iha futuru ne'e labele akontese, tamba governu AMP iha prosesu foti osan iha Fundu Petroliferu la tui ona kalkulasaun rendimentu sustentavel mak regula ona iha lei Fundu Petroliferu. Signifika katak, hahalok husi governu ida ne'e sai ameasa boot ba futuru jerasaun tui mai. Tamba ne'e Luta Hamutuk nudar sociedade sivil maka durante ne'e monitora Fundu Petroliferu no eksekusaun orsamentu geral do estadu, hakarak hatu'o nia pozisaun ba governu nebe proposta atu foti osan husi Fundu Petroliferu ba iha orsamentu rectificativo.

Proposta Luta Hamutuk

1. Husu ba governu atu iha prudensialidade ba espirtu lei Fundu Petroliferu
2. Husu ba governu atu labele taka matan wainhira halo proposta hodi foti osan husi Fundu Petroliferu.
3. Husu ba governu atu kalkula di-diak sustentabilidade Fundu Petroliferu ne'e rasik hodi nune labele hetan krize iha tempu oin mai.
4. Husu ba governu atu labele ambisiozu hodi foti osan Fundu Petroliferu sein tetu risiko mak atu mai.
5. Husu ba Parlamentu Nasional atu analiza didiak kontiudu proposta orsamentu rectificativo husi governu nebe atu foti osan husi Fundu Petroliferu antes aprova.

Mak ne'e deit ba ita bot sira nia partisipasaun no kolaborasaun la haluha ami hatu'o Obrigado wain.

Dili: 01 de Julho de 2008

Ekipa Luta Hamutuk